



TAPAK 8

**Saudi Arabia, UAE dang nok-o-nü ayokba
Biden administration-i anenja atar**



TAPAK 7

**AAP-i state trok assembly
elections nung tokteptsü: Kejriwal**

VOL. XVIII NO. 105 (ADOK 105) DIMAPUR

ROGONÜ (FRIDAY) AENJETI (JANUARY) 29, 2021

₹ 5.00

Nagaland Chief Secretary Temjen Toy süogo



Temjen Toy

Dimapur, Aenjeti/January 28 (TYO): Nagaland Chief Secretary Talitemjen Toy mapang tatsüka cancer agi shiranga arur Brehostibar nikongdang Kohima nung par kidang asü. Pa arishi küm 57 tain liasü.

Osang kar ajanga ashiba agi, taoba küm pa dak iba tashidak putetba sülen New York nung temang anepalua aru.

Pa tawa state-i meypa shilang, saka yashi pa temang tamajungba akum aser January 28, 2021 nü Kohima nung asü.

Toy ya temesen cancer agi

timtema liasü aser Delhi nung mozüki ka nung temang anepalua liasü. Pai kinungtsü, jabaso ana aser jala ana yutsür iba lima nungi pilaogo.

2018 küm March ita Nagaland Chief Secretary menden agizüksang Temjen Toy ya1989 batch IAS officer liasü.

2020 küm October ita pai "Taneptsü anguba mapang" ta Twitter nung zülu, aser ibaji pai tweet asüba tatembangba liasü.

Pa asüba osang angashia state kinük ajungalen nungi sangdong balala nung asüku lemsatepba mapang lir.

Nagaland Chief Minister Neiphiu Rio-i tweet ka nung, "Nagaland indang Chief Secretary @temjentoy asüba asoshi ni kanga jashir. Pa ya ajemalur, ochishir aser bendanga agütsür sorkar tenzüker ka liasü. Pa asüba ya Nagaland sorkar aser talisa Naga nunger ajunga asoshi takoksa tulu. Par kinunger den asüku lemsateper. Pa tanüla tesunep nung anisüngzükjangma," ta zülutsü.

"Asenok den Shri @temjentoy mali ta meteta kangasa jashir aser aoksar. Asenok asoshi tetangshi administrator aser meimchir tajung ka samaogo! Pa tanüla tesunep nung anisüngzükjangma. Iba mangyim tejashi koktettsü asoshi Tsüngremi par kibong nem tashi agüjang," ta Raj Bhavan Kohima ajanga tweet asü.

"Pa ya nisung tajung den tesüngmangtsü sempet aketba nübu ka liasü. Pa ajungbena asüba ya asen Nagaland administration asoshi takoksa tuli. Mangyimer kibong nem tashi agüjang aser asür tanüla tesunep nung anisüngzükjang ta ni sarasademtür," ta taoba Nagaland governor, PB Acharya-i ashi.

BJP National Spokesperson aser Mizoram state in-charge Mmhonlumo Kikon-ia tweet ka nung, "Temjen Toy asüba ajanga Naga nunger atema prangshia aliba petinu ka samaogo," ta zülua liasü.

Nagaland MP Tokheho Yeptthomi-ia Temjen Toy asüba mangyima lemsatep. "Nagaland

Chief Secretary Temjen Toy asüba ajanga ni kanga jashir. Pa ya teindang nisung ka liasü, shiba dak ochi aser ajemalu molungsentsü liasü. Nagaland asoshi nisung tajung ka samaogo. Pa tanüla tesunep nung anisüngzükjama," ta Tokheho-i tweet asü.

Nagaland indang Deputy Chief Minister aser BLP lenir Y Patton-ia sangdong ka nung, Temjen Toy IAS, Chief Secretary, Nagaland mapang tatsüka shiranga arur asüba osang angazüka aoksar aser sasar, ta lemsatep.

Toy ya 1989 küm UPSC tatidang ajanga IAS cader angu aser jenjang balala nung mapa ajetba administrator ka ama tenzüka arur Chief Secretary jenjang tongtet.

State nung administrative tsütsü pai aisü nung temelenshi bener arutsü aser iba atema state sorkari teti pa tenüng tetshitsü. Pa asüba ajanga state nung administrator metsü tajungtiba ka samaogo aser iba tawa asüngtsü kanga tasak asütsü, ta Patton-i ashi.

Ozü kibong aser state BJP

legislature tem tenüng nung mangyimer kibong den asüku lemsateper, ta Dy. CM ajanga ashi.

Nagaland Opposition lenir T.R. Zeliang-ia sangdong ka nung, Nagaland Chief Secretary, Temjen Toy asüba osang angashia ni aoksar aser temolung shiranger, ta ashi.

Pa asüba ya Naga nunger aser talisa State sorkar asoshi takoksa tulu alitsü, koba pai tematiba nung nendaka aser bendanga agütsür tenzüka aru. Pa ya shisa taka bureaucrat ka liasü, shibai state sorkar kübok menden balala nung pa nem mapa nungloksüba nung tamakokmajurui inyaka liasü, ta T.R. Zeliang-i ashi.

Tembar tajung aser adianu ka ama pa den jangratema lia aruogo. Ni Chief Minister inyakba mapang pa Principal Secretary to the Chief Minister liasü aser iba mapang pai o bulua mejembiaka kanga tekum dang, tesüngjem aser mapa nung bendanga agütsür inyakba nguogo, ta pai ashi.

(Maneni tapak 2 nung...)

CNTC-i Dhansiri apu tejenba tekaraba nung renemtsü mepishir

Dimapur, January 28 (TYO): Central Nagaland Tribes Council (CNTC)-i state sorkar, department incharge aser contractor dang joko menoa melii Dhansiri apu tejenba tekaraba nung renemtsü atema mepishia metetdaksüogo.

Iba apu yanglu tenzüker küm pezü jungogo; iba apu renemtsü atema mapang kanga indokogo, kechiyong tetsükdaksü aika liasü, ajüsüa tesülen ang yanglu tenzüker apu karbo renemogo, ta CNTC Tir, T. Lanu Imchen-i sangdong ka nung metetdaksü. "Iba apu renemra sensotem kanga

anisüngzüksü, kechiyong Dimapur nung traffic teblemtsü ajemtsü atema iba apu ya kanga tongtibang tesendaktep lenmang ka lir," ta CNTC sangdong nung shia lir.

"Iba apu yanglutsü atema mapang talangka agiba agi Dimapur nung Zion Hospital nungi Khormalal police point aser City Tower tsüngda gari senzusempongba tsütsü timtem tali adoker. Anungji CNTC-i kettangsertem dang iba mapa tekaraba nung renema nüburtem anisüngzükdaksütsü mepishir," ta sangdong nung shia lir.

Nagaland nung nisung ka dak Covid-19 tashidak putet

Dimapur, Aenjeti/January 28 (TYO): Nagaland nung tanü nisung ka dak Covid-19 tashidak putetba sülen tang tashi nung tashidak puteter 12,081 jungogo aser kasa mapang nung shiranger pongu anepogo. Tang tashidak agi tonger temang anepalu alir parnok 52 lir.

"Tanü Peren nung nisung ka dak tashidak putetogo," ta Director of Health and Family Welfare, Dr. Denis Hangsing-i metetdaksü.

Nagaland nung tang tashi nung nisung 11,801 bo anepatokogo.

Tang tashi nung tashidak agi nisung 88 süogo aser shiranger 143

tanga state-i anirogo, ta paisa ashi. Tashidak menar alirtem rongnung parnok 4,985 Traced Contacts, armed forces personnel 4,669, tanga state nungi arurtem 1,857 aser yakbang nung inyakertem 573 lir, ta Dr. Denis-i metetdaksü.

Tang temang anepalua alirtem rongnung nisung 15 dak tashidak keta aliba temaitsü terara sayudar, nisung ka kanga mejuungi shirangdar aser nisung 36 dak tashidak keta aliba temaitsü kecha mesayur, ta pai ashi.

Nagaland nung tang tashi nung sample 1,24,466 tendangogo

CM Rio-i Sechii Zubza Village Council Hall semzüksü

Kohima, Aenjeti/January 28 (TYO): Nagaland chief minister Neiphiu Rio-i tanü Kohima district kübok Sechii Zubza nung Sechii Zubza Village Council Hall semzüksüogo.

Sentepa aliba lokti den o jembiba mapang Rio-i, Council Hall yanglutsü atema tenla tajung agütsüba atema Sechii Zubza nung alirtem dang pelaba lemsatep.

Rio-isa, lokti nung yimjung aser telongjem dang lira ajak takoktsü, ta ashi.

Paisa, nüburtem dang maneni lenla ajak nung terenlok atema longjemer alitsü ayongzüük.

MLA Keneizhakho Nakhro aser Western Angami Public Organization (WAPO) tir Kevisekho Chiicha natia sentong nung o jembia liasü.

Iba sentong ya organizing committee convenor Neidilhoutuo Sechii lenisüba kübok agi aser Sechii Zubza Village Council chairman Mhasikhotuo Zhiinyii-i lokti pelaa agizükba o jembia aser Building Committee convenor Khriengulie Kuotsu-i tepela anküp o jembia

liasü.

Nagaland youth resources & sports advisor Er. Zale Neikha aser Nagaland technical education & election advisor Medo Yhokha nata iba sentong nung dena liasü.

Sentong nung o jembiba mapang Rio-i Sechii Zubza takaratiba nung jila kümdaksütsü yongyaba lemsatep. Pai, yimdak lenirtem aser shisakartem dang Sechii Zubza ya jila kümdaksütsü atema khen bilemdangtsü ayongzüük.

Sechii Zubza yakta jila kümdaksütsü jangraba lemsatepba mapang Rio-i, urban local bodies kümetba sülen Sechii Zubza nung alirtem terenlok tsütsü maongka aika angutsü, ta ashi.

Sechii Zubza ya shishilembadak tongtibang ka akümtsü temsüa lir, kechiyong iba ya National Highway nung lir aser iba tesem nung Railway Station yanglutsü atema benoka lir, ta pai ashi. Iba tesem ya shisa muludak tesem ka kümtetsü, ta pai shisem.

Maneni Rio-i, Nagaland nung district HQs ajak nung aluyimertem

atema shishilembadak lapoktsütsü state sorkar sentong aliba lemsatep.

Iba ajanga aluyimertem nem parnoki tsünütetba ayoktsü atema maongka agütsütsü.

Rio-i ashiba agi, COVID-19 wara ajanga asenok ajak nem aluyimba aser allied sector tem nung temulung agüja inyaka pei poksüng aazüksü atema tangazükba tajung ka agütsüogo.

"Asenok ya adokdaksüba lokti ka masü saka achiba lokti ka lir," ta Rio-i shia shishilembadak chiyongsütem talila adokdaksütsü mapang tongja tongogo, ta ashi. Paisa shishilembadak takhangbatema temulung dang ayutsü nungdaker, ta shisem.

CM-i, Nagaland nung Arogotemi lokti nung temelenshi atema ajungmesodaksüner aser Naga nunger lokti nung mapa meranga inyakba sobaliba tanaben asüngsashidaksüner.

Chief minister-isa, nisung ajaki tangar dak metaloker aliba yimya toktsür mapa meranga inyaker chiyongba yimya benshitsüla, ta ashi.

"Rangben temelen" dak rangloker 38 buba OKM lokti senden amung

Mokokchung, JAN 28 (TYO): Ongpangkong Kaketshir Mungdang 38 buba lokti senden sentong "Rangben Temelen" omen dak rangloker yangi Mokokchung town hall nung takok ngua mungogo. Alima tensa tia majungba ajanga taküm iba lokti senden Mokokchung town hall nung amungtsüsa aküm.

Covid-19 wara nungi kümdanga alitsü asoshi tetuyuba agütsüba "SOP" nung ajemdaker sentong ajak kanga kümdanga agi aser nisunga teshimtet dang jaoka munga liasü.

Tanü iba sentong nung tetushi tejaoker, Mokokchung Deputy Commissioner, Wb. Limawabang Jamir-i jembidang, taoba küm ishika

jakdang nungi OKM-i pei tetsü oshi wazüka ayutsü meranga sentong tapu balala achayanga agiba ya jangratemtsüka lir, ta tenüng sanga ashi.

United Nations Educational, Scientific and Cultural Organization (UNESCO)-i tanü alima nung anogo shia oshi ana-samar ta bushiteta lir, aji doa, mekümdangra, Ao oshia samatsü lendongbang nung lir, anungji, yamaji mataloktsü asoshi lanu putu nem pei tetsü oshi sapudaksütsü asoshi meneni ajungshitsüla, ta ashi.

"Tanü alimai degree tulu masü saka wainshin aketba, sobaliba metetba, Tsüngrem akhümtsüba aser tangar dak menendaki pei sasa

tepok sünga litetba lanur nungdaker', ta ashi. Paisa iba dak sentakba nung ashidang, 'taoba mapang 3Rs (reading, writing and arithmetic) dang liasü saka tanübo 4C's (critical thinking, collaboration, creativity and communication) agi melenogo, anungji, alima den jangyu medema aotsübaji kanga tongtibang', ta paisa kaketshirtem ayongzüük.

"Rangben temelenshi" ta asüba ya lenla ajak nung melenshiba dang ajar, anungji, shisatsü, tangatetba, sobaliba aser libaliru ajak nung melenshitsü asoshi ajungshia liasü. Mokokchung DC-isa OKM-i adokba "Limketer" ta sür nungo kaket ka sayatsü.

(Maneni tapak 2 nung...)



**OFFICE OF THE
AO SENDEN**

H.Q: MOKOKCHUNG : NAGALAND
Ph: 0369-2228896/ e-mail: aosenden@gmail.com

AYIMOKTSÜR

Asen lenir, Nagaland Government nung arkhutong asür Wb. Temjen Toy, IAS, Chief Secretary, Govt of Nagaland, 28th Jan. 2021 anogo asüba osang angashia Ao sendeni kanga sasaset mang ayimer aser asür kinunger den asüku lemsateper. Ao kin rangben asen lenir asüku nung atenba tamaitsü 29th Jan 2021 anogo Ao litsü ajak nung Govt. aser Private officetem School, shishilembadak ajak shibanger mang yima amongtsü Ao Senden ajanga Ao Sünak abener ajak dangi ayimoktsür

**Sd/-
Chubawati Longchar
President**

**Sd/-
Imtipokyim
Secretar**

Don Bosco Kohima hon jubileemung January 31 nungi tenzüksü



KD Vizo aser dangartem Kohima nung January 27, 2021 nü osangbener den jembiba mapang tangokba noksa ka yangi angur.

Kohima, Aenjeti/January 28 (TYO): Don Bosco Kohima küm tepiyong Hon jubileemung ya "Towards a better world with Don Bosco" omen nung ajemdaker January 31 nungi tenzüksü.

Don Bosco Kohima ya 1971 küm tentet. 1975 nungi 2020 tashinung iba kaket reju nungi kaketshir 3588 tashi HSLC ajangtetogo. Maneni iba reju nung 1997 nungi 2020 tsüngta kaketshir 1141 HSSLC (Science) ajangtetogo aser 2011 nungi 2020 tsüngta HSSLC (Arts) azünger kaketshir 858 ajangtetogo.

Tang Don Bosco Kohima nung nursery nungi higher secondary tashinung Don Bosco College densema kaketshir 2200 lir.

Bodhbarnü Kohima nung osangbener den jembiba mapang

Don Bosco Kohima Jubilee Organizing Committee mendenpuba, KD Vizo-i ashiba agi, küm tepiyong iba benjongmung mungyonga aoba mapang music, art, literary aser danga sentongtem ayongzüksü.

Küm tepiyong mungyonga aoba sentong ya November 2021 hopta tanabuba nung tembangsü.

Küm 50 tashi shisaliok nung tematiba jenjang nung agüja aser tenzuka aruba mapang ibai taochi aser temoatsü benjongmung ka asütsü, ta Don Bosco Kohima nungi alumni, Vizo-i ashi.

Iba hon jubileemung takok ngua amungtsü atema organizing committee senden aiben mena arutagi, ta Vizo-i metetdaksü.

Iba hon jubileemung tenzükba sentong ya Don Bosco Kohima

nung January 31 nikongdang 4:00 ako nung alitsü.

Iba sentong nung nisang asongba aser milen tsüklokba den golden jubilee sky lantern yoktsü aser jubilee nungtem nung music/video album sayatsü.

January 31 nikongdang sentong nung KD Vizo-i tarur pela agizükba o jembitsü aser Fr. Innocent Panmei SDB, vice-principal, Don Bosco Higher Secondary School ajanga Don Bosco otsü tongmelang agi lemsateptsü.

Dr. Zavei Hiese (1st Batch) aser Fr. Kuriakose SDB nati "Reminiscing the past" atema mapang agitsü aser Fr. P. Suresh SDB, Rector & Principal Don Bosco College aser Fr. T.P. James SDB, Principal, Don Bosco Kohima nati salem o lemsateptsü.

Iba sentong nung Mmhonlumo Kikon, Advisor IT & C, Science & Technology & NRE ajanga o jembitsü.

Maneni Vitsu Peter Yhome, general secretary, Don Bosco Kohima Jubilee Organizing Committee ajanga tepela ankep o jembir iba sentong tembangsü.

Iba sentong nung adentsü asoshi taoba mapang Don Bosco Kohima nung azünger ajak pelashishia jaoker, ta sangdong ka ajanga ashi.

Nagaland Chief Secretary...

(Tapak 1 nungi...)

Tembar tajung aser adianu ka ama pa den jangratema lia aruogo. Ni Chief Minister inyakba mapang pa Principal Secretary to the

Chief Minister liasü aser iba mapang pai o bulua mejembiaka kanga tekumandang, tesüngjem aser mapa nung bendanga agütsür inyakba nguogo, ta pai ashi.

Asür Temjem Toy-i nübur asoshi tajungtiba inyakogo aser state aser yangi aliba nübur asoshi pai shilem tajung agiba teti bilemtetsü. Tang mangyim jashi mapang Tsüngremi mangyimer kibong nem anisüngzüik agüjang ta sarasademtsür, ta T.R. Zeliang-isa ashi.

Tanü nikongdang Temjen Toy, IAS, Chief Secretary, Government of Nagaland asüba osang angazüka Nationalist Democratic Progressive Party-i mang ayimer, ta NDPP tir, Chingwang Konyak-i sangdong ka ajanga ashi.

Nüburtemi kanga jangja metetba aser tushia amshiba kibong ka nungi pa yimyaliru nung tatishitsü tajung jenti keta liasü.

Tensa tamajung süaka pai kodanga ola madok aser lenir ka dak alitsü sempet ajunga pa dak keta liasü.

Pa den külemi inyaktsü maongka angur ajungai pa meim, temolung süa agizük, saklok aser pa dak ranglok; pai ketdangsüba nüburtemi pa atema tajung dang ashitsü lir, ta sangdong ajanga ashi.

Pa kübok tenzükur dang pei mapa tajungtiba nung inyaktsü atema pai teti ajungshia lenmang sayua aser shisatsü agüja aru. Tongtipangsa pa ya Tsüngrem tsübobba takum ka liasü aser Tulusang Tsüngrem aser nüburtem matsüngdang majung ta bilemba mapa aser inakyim nungi pa pila ali, ta NDPP ajanga ashi.

Bureaucrat tem rongnung pa ya khuret kokteter ka ama züngshi, kechiaser pa adenba kijaia mangatetep adoka alirtem tsüngta tangatetep kati arua pai kanga kumdanga kazüka yokba nung anidak, aser state sorkara political party kobai anidir aniaka pa nungi jenjang balala nung ajangzuka liasü.

Pa asüba ajanga Nagaland atema sentilong ka, ketdangsür ka samaogo aser pa ama asenoki aiben mangutsü. Nisung kija shiai aginüba yimya ajunga pa dak liasü aser lanurtem asoshi nükrangdong ka liasü. Kü den külemi NDPP nung sendaka alir ajaki mangyimer den asükhu lemsateper aser asür tanüla teti tatem maka tesunep nung anisüngzüikjangma, ta NDPP tir kasa sangdong ajanga ashi.

Anojungi state nung senior most bureaucrat asüba asoshi Dimapur Naga Students' Union-i mang ayimer, ta DNSU Media Cell sangdong ka ajanga ashi.

Asür Temjen Toy, IAS, Chief Secretary ajanga lenla ajak nung akok tashi lokti asoshi shilem agiba atema DNSU-i tematiba nung akhum agütsür.

Nagaland state asoshi tetemjen tebu, jabaso, ketdangser aser senso tajung ka samaogo.

Pa tanüla tesunep nung anisüngzüikjang aser mangyimer kibong nem tesuneptsüba agüjang ta sarasademtsür, ta DNSU sangdong ajanga ashi.



Miathou Krose, Chairman, NHHDC Ltd ajanga January 28, 2021 nü Special Handloom Expo sayatsü. Iba Exhibition ya Office of the Commissioner of Handloom, Ministry of Textiles, Government of India ajanga sponsor asü aser NHHDC Ltd ajanga Urban Haat nung ayongzük, koba February 10, 2021 tashi lapoktsü. State pezü, Uttar Pradesh, Manipur, Assam aser tayonger state, Nagaland nungi telok 50-i iba sentong nung shilem agir, kong ola-angla agi yangluba osettem ayoktsü aser reprangtsü atema stall lapoka lir.

Dimapur nung Army recruitment rally March 10 nungi alitsü

Dimapur, Aenjeti/January 28 (TYO): Bhagat Stadium, Rangapahar Military Station, Dimapur nung army recruitment rally ya March 10 nungi March 20, 2021 tashi alitsü, ta Army Recruiting Office Rangapahar ajanga sangdong ka nung

metetdaksü. Iba rally ya Category balala atema Nagaland nung aliba district ajunga atema alitsü. Tejangrartemi online registration atema www.joinindianarmy.nic.in nungi agitettsü, ta sangdong ajanga ashi.

National Immunization Day 2021 atema ayongzükur

Dimapur, Aenjeti/January 28 (TYO): India nung January 2011 nungi wild polio cases mali arur aser India nung polio anema terenlok tulu aliba gua WHO ajanga 2014 küm March ita India densema south east region nem kulizüng agütsüogo.

Alima nunga nung wild polio virus ya mesama tashi bendang lima nungi India-i iba tashidak bener arutsü kanga zübar lir. India Expert Advisory Group (IEAG) on Polio ajanga ashiba nung ajemdaker National Immunization Day ya OPV amshia tanur arishi küm 0-5 nung alir ajak awajema agitsü.

India nung aliba danga state tem den külemi Nagaland nunga Intensive Pulse Polio ya January 31, 2021 (Deobarnü) tenzüksü.

Department of Health & Family Welfare ajanga state tesem ajungalen tila-tanur arishi

küm 0-5 nung alir ajak nem Polio agütsütsü atema renema lir. Iba atema state nung Polio Booth 2206 amenoktsü aser health ketdangsür nisung 9096 aser supervisor 441 den mozü aser danga nungdakbatem yoktsü.

Dangalen nungi Polio cases bener aruba nokdangtsü nükjidong nung migrant population nem tali temolung agütsütsü.

Taoba mapang tashi angatepba aser amalitepba atema pelaba lemsatepba mapang Department ajanga lokti tentet ajunga, agencies tem (Government aser non-government, security forces aser police), arogo aser talisa tanur arishi küm pongu tekübok aliba tsüraburtem dang January 31, 2021 nü pei tanur nem "Two Drops of Life" (Polio Drops) ya agidaksütsü ayongzükogo.

Arunachal nung NSCN züngsem pongu temai adok



Guwahati, Aenjeti/January 28 (Agencies): Arunachal Pradesh kübok Longding tesem nung Bodhbarnü NSCN züngsem pongu (NSCN-IM züngsem ana aser NSCN-K züngsem asem) security forces matsüngdang bendanga agütsü.

Security forces temi ita aika maparen balala meranga inyakba sülen NSCN züngsem pongu temai adokdaksüogo, ta sangdong ka ajanga ashi.

Parnok ya Longding SP, Vikram Harimohan Meena aser Deputy SP Banghang Tangjang lenisüba kübok Longding Police

aser Assam Rifles matsüngdang bendanga agütsü.

Par pongu rongnung NSCN (IM) züngsem ana ya Self-styled Private Wangchen Wangsa (45) aser Self-styled Lance Corporal Aaom Wangsu (24) alitsü aser NSCN (K) züngsem asem ya Self-styled Private Chapha Panda (30), Jewang Wangsa (47) aser Lance Corporal Chaibo Panda (33) alitsü.

Temai adoker telungpur ya tashiyim amshia senotsü mechiba aser saru saruba nung shilem agia liasü, ta sangdong ajanga ashi.

"Rangben temelen" dak... (TAPAK 1 NUNGI...)

"Tejakleni raketa otetba yimli asoshi shisamulung tasen" onük nung ajemdaker panel discussion sentong balaka agi aser iba nung shisalen sayurtemji; Lead District Manager, Mokokchung & Longleng - Wb. Kreho Athili, NABARD Mokokchung DDM - Wb. S. Amarjit Mangang, Mokokchung Chief AH & Veterinary Officer - Dr. B.M Sunep aser Retd. Principal - Wb. Akok Walling parnoki shilem agi. Sentong ka nung Straightway Christian Mission Centre Mokokchung Administrator, Dr. Awala Temshi-i "Rangben temelenshi asoshi tsüngchi lanur" onük nung ajemdaker tagitsü o aika bener arua lemsatep.

Bangzüng kar renema ayuba rongnung; tzü mopung kümzüka ayutsü nükjidong nung Ongpangkong jila balala ajak nung lirumedema sentong balala achayanga inyaktsü. Aor libajen kümzüka/wazüka ayutsü nükjidong nung Ongpangkong yimtsüng shia akhi yimya nung asüba Aor ki kaka asütsü aser iba ki dak sentakba nungjakoja aser kisüba maparen ajak documentary yanglutsü lemtet.

Iba den rongsenkettsüng renlokba mapa nung nüburtemi tali jeta inyaktsü nükjidong nung Ongpangkong yimtsüng shia nung OKM-i achayanga onük nung ajemdaker tagitsü o ayongzuka akatsü lemteta yuogo.

OKM OFFICE BEARERS ITEMI SHIM:

- | | |
|-----------------------------------|----------------------|
| (1) Limatongzuk(Ungma) | - President |
| (2) Lanuakum (Kubza) | - V/President |
| (3) Waluniba kichu (Aliba) | - G.Secy |
| (4) Supongmeren Jamir (Moalenden) | - A.G.S |
| (5) Takusunep pongen (Mangmetong) | - Executive Chairman |

Assam: Telungpurtemi tetsür ka dena nisung ana khaset



Guwahati, Aenjeti/January 28 (Agencies): Assam kübok Karbi Anglong district nung telungpurtem asütsü ta temulung melemi bilemba telok kati yimtsüing ka amakba mapang taoba mapang Dima Halom Daogah (DHD) telungpur züngsem ka aser tetsür ka khasetogo.

Police-i ashiba agi, Bodhbar aonung telungpurtemi Kharnaidisha yimtsüing nung injang khaloktsüba mapang arishi küm 42 tain Amit Nunisa aser Alota Maibongsa (60) na iba tesem nung khaset.

Kasa mapang nung arishi küm 25 tain nisung ka tenüng agi Ashit Phonglosa-a, injang agi yirutsü aser pa mozükidangi aritepa anir ao.

2003 küm Dima Halom Daogah (DHD) telungpur aser sorkar na tsüngda tenangzüktepba ka yangluba sülen Nunisa-a tanga telungpurtem den bendanga agüja liasü.

"Onok mejanga aliba mapang injang khaloktsüba ola angashia sak. Yimdaklirtem kilung nungi adokba mapang prangbong amer nisungtemi

nisung ana khasetba den ka yirua toksür yimtsüing toksür oya angu," ta yimdaklir kati ashi.

Karbi Anglong District Superintendent of Police Debajit Deori-i anir sepaitem aika iba tesemi aritepa ao aser item nisungtem bushi tenzük.

Dimasa National Liberation Army (DNLA) koba 2019 küm tentet, parnoki iba lendong bener arutsü asütsü ta temulung melemi bilemer.

Asür anaprongla ya anogo ishika tejakdang Karbi Anglong district nung 'Bisudima' benjung nung shilem agiogo.

Manipur: College tesayurtemi CM nem takhangba ka agütsü

Imphal, Aenjeti/January 28 (Agencies): Government college tesayurtemi Brehostibarnü Imphal nung mener longkak aitba sentong ka den senden ayongzüka menogo. 7th University Grants Commission (UGC) and Regulations, 2018 dak sendakba nung state sorkari tetuyuba magütsüba sülen chief minister N Biren Singh dang ken o reprangshimtsütsü parnoki khanga liasü.

Federation of Government College Teachers Associations, Manipur (FEGOCTA)-i achaayanga Imphal kübok NG College nung longkak aitba sentong ka ayongzüka agi.

FEGOCTA general secretary Dr N Somorendro Singh-i, 2020 küm August 6 nü state cabinet-i temelaba agütsüba dak ajemdaker 7th UGC and Regulations, 2018 dak sendakba nung tetuyuba agütsütsü atema association-i January 11 nü chief minister N Biren Singh nem tezüluba nung takhangba ka agütsüogo, ta ashi.

"7th UGC pay and UGC Regulations, 2018 dak sendakba nung tetuyuba magütsü tashi onoki democratic yimya nung longkak maneni aittsü," ta Dr Somorendro-i ashi.

"Government college tesayurtem atema 7th UGC pay and UGC regulations, 2018 indang order issue aütsü atema January 27 lateta toksür. Iba anogo tashi nung takhangba mataloktsüra January 28 nü nungi maneni longkak aittsü," ta FEGOCTA tir Dr A Pishak Singh-i CM

dangi tezüluba nung takhangba agütsüba nung shia lir.

Tesayur lokti tentet-i ashiba agi, 7th UGC pay and Regulations, 2018 benoktsü atema Ato Kilonser Narendra Modi-i, küm asem tejakdang temelaba agütsüogo. Ajisüaka sate nung tang tashi iba policy mebenoki lir.

State nung national policy tang tashi mebenokba atema tezü atangba indang jembidang Somorendro-i, aiben mepeshiba den cabinet-i temelaba agütsüba sülen anogo 154 tashi nunga ketdangsürtemi iba setong benoka minyakteter, ta ashi.

FEGOCTA-i ashiba agi, 7th UGC pay ya state nung sorkar tenzükür lakh 1 shi atemabo benokogo saka college tesayur tashi mebenoki lir.



Agartala, January 28: Tripura tableau, koba au koda eco-friendly lir iba dak ajemdaker yanglua liasü, iba tableau yagi Republic Day parade nung tanabuba jenjang ngutetogo. Union Minister of State for Youth Affairs & Sports (I/C), Kiren Rijiju-i award agüja liasü. Iba tableau ya 'Eco-Friendly' and 'Aatma-Nirbhar' nung omen nung ajemdaker yanglu.

Tripura nung doctor ka züka merenshi

Agartala, Aenjeti/January 28 (Agencies): Medical nung inyakerter merenshiba tatalokba ka nung ano Tripura nung sorkar mozüki doctor ka nisung telok kati Gomti district nung züka merenshi.

Doctor Partha Talapatra, shiba Gomoti District kübok Natun Bazar Rural Hospital nung inyaker, pai shiranger ka Gomti district hospital-i anir aotsü atema tuyur aliba mapang asüba sülen shirangsang anükertemi pa züka merenshi

Shirangsa Pradip Das asüba sülen par kinungertemi Dr Partha Talapatra aser health worker Lalmohan Banik na dak teka sangshia merenshi.

Dr Partha Talapatra-i iba tatalokba dak sendakba nung Natun Bazar Police Station nung ken o ka benokogo.

Ajisüaka ken o dak sendakba nung tang tashi nung police temi nisung ka danga pua mali.

Kasa mapang nung All Tripura Government Doctors' Association (ATGDA)-i duty nung aliba doctor ka züka merenshiba aitsüogo.

"Onoki linük temzüing ozüing dak tamang akar aser police temi iba ken o nung densema alirtem takaratiba nung aputsü ta amnger," ta ATGDA-i ashi.

Tripura nung doctor tem züka merenshiba ya tang mezüing masü.

Taoba mapanga state nung doctor tem aika züka merenshiba osang angazükogo aser tesüsa December 3 nü doctor ka merenshiba angazükogo.

Decembr 3 nü Tripura kübok Khowai District nung sorkar mozüki nung doctor ka züka merenshia liasü.

Indo-Bangla nung BGB-i atsü atsüba nokdanger



Agartala, Aenjeti/January 28 (Agencies): Tripura asüolentiplen Sabroom tesem nung Bangladesh Border Guards (BGB) temi Indo-Bangla international arrtsü nung India nunger construction company kati atsü atsüa aliba nokdangba sülen mangatettep adok.

Sabroom ya Bangladesh den arrtsü nung Tripura anüolentiplen kinük nung lir.

Ajisüaka Indo-Bangla international nung ano tesem aika nung atsü matsüi lir.

Construction company nungi mapa inyaker kar Sabroom kübok Aailmara tesemi merang inzü agi atsü atsüi ao.

Ajisüaka arrtsü nung amenoker aliba BGB sepaitemi parnok nem tenokdangba agütsü.

Sub-divisional magistrate-i tensa azüoktsü atema Bodhbarnü nikongtsütsü iba tesem nung section 144 benokogo.

Iba tesem nung dokan aser local shishilembadak ajak shibanga liasü, kechiyong BGB-i injang khaloktsütsü ta nüburtemi tsüba bilem.

Local temi ashiba agi, taoba mapanga iba tesem nung atsü atsüba nokdangtsü atema BGB sepaitemi injang khalokja liasü.

"International arrtsü nung Aailmara nungi Sabroom Market tashi km 4 ano atsü matsüi lir," ta local nisung kati ashi.

"Atsü matsüi aliba maongka agi, Bangladesh nungi nüburtem India-i aiter. Atsü atsüa maliba ajanga arrtsü adena shibelenba maparen tali kümдар," ta pai ashi.

India aser Bangladesh border force-a ibda ken o dak sendakba nung Maitri Setu nung senden ka menogo, ajisüaka tebilemtsütem mebenetteti tembang.

Kasa mapang nung Border Security Force (BSF)-i, Sabroom kübok international arrtsü nung lendong kecha mataloktsü atema sepai talila yoktsü asüingdangogo.

Bangladesh Border Force-isa, Tripura anüdoktiplen tesem ka nung Indo-Bangla international arrtsü nung merang inzü agi atsü atsütsü atema tenokdangba agüja liasü.



TIR YIMYIM YIMOBILEM (EDITORIAL)

DIMAPUR ROGONÜ, AENJETI (JANUARY) 29, 2021

ASENOK TEMULUNG MEYIPDI

Tanü tazünger tajungtem den kechi onük lemsateptsü ta bilema alidang, ajungbena Nagaland Chief Secretary, Wb.Temjen Toy asüba osang angashi dang kanga aoksa aser atangji, shiba südir süang, asenok taküm nung kiburji asen masü saka Tsüngrem lir ta tali tejangjaba nung angatetdaksür, anungji Laishiba nung Yob-i ashi ama, Tsüngremi agütsü aser Tsüngremi bener aoer. Aji oda, asodanga aser asünüa Pai agütsüba taküm atema Pa nem tenüngsang agütsütsüba dak alaka asenok meimchiri jashia mangyimba agi asen adianu, tsürabur aser apuani asen dangi meyipa marutsü. Laishiba nungsa Yakob-ibo alima nung asenok taküm ya tangola ka danga ta shia lir aser atangji kodang ibaji jungjunga bilemdangdir, asen taküm ya ajungli nung tangola apuoktsür arakzüdaksürba dang lir, anungji kodang tangolaji temdir, temangji marakzüksü aser ajunglisa kuma aotsü. Ibaji kodang asenoki angatetdir, alima nung mapang tatsüka alidang ya asenok o asenok na meimtepa alitsüba dak alaka tsükchiteptsü nungdak madoker. Kong koba lima nung südir süang, lanur lenir tajung adokbaji Tsüngremi nübortem meimba agi adokdaksür aser kodang nübortem Tsüngrem tsüngdang temeimtsü maket lidir, idangji Pai agütsüba bener aoer. Wb.Temjen Toy ya arishi küm 56 dang lir, tang nübortem tenzüksü tajung, tekümküm mapang saka anojungi pa asenok nungi bener oadokbaji pa masü asenok nübortem tia maka aser takoksa tulu lir. Pa ya tulusüka kanga ajemalu, nübör meimba aser alima asoshi tajung inyaknuba shisatsü dena aliba yimten nung ketdangser ka liasü. Pai tulusür tilar mebendang aser aiben nübortem nungi shisatsü agia telemtetba agiba lenir ka liasü. Asenoki aiben asenok dak atalokbatem mereprangtetter dang ashi, tanü asen lima nung asenok madak yimten nung tongti ketdangsertem ajunga amai bendangertem kümogo. Naga nung, aser talisa Aoer, rongnungi joko mapang talangka state nung aruagi asenok asoshi sentong yanglutsür asütsüsa UPSC ajanga agiba tatidang nung madoker. Küm talangka lir yaküm to Lotha nung ka, tetsübo Aotsür, jabaso tajung kati IAS jenjang ngutetba asenoki angashiogo, saka pajia Nagaland nung masü tanga state-i yokogo. Iba tiaji kodang bilemdangdir, Naga nung chanu, balaka Aoer chanutem, rongnung tangar adoksaa tangatetba aser temetetba aliba lanurtem mali na (?) ta temulungi tasüngdangba tuluka arur. Atangji, asenok tsüraburtem tanguba rongsen ajak pei chinur education asoshi endoker aser yamaji kar majung agibo chirnurtem aika tangar adoksaa jungjunga azüngba aser metetba tashitemetettertem lir, saka kechiba parnok jagi tangar menepa tulusür jenjang mengutetter ? Ibaji kodang asenoki bilemdangdir, chirnur tajung maliba agi masü aser lanur tajung mesotetba agi masü saka asenoki asen yimkong aser asen lima nung Tsüngrem mepelatsüsa aliba agi mazükmaru atener asütsüsa akok. Iba tiaji asenokbo khen bilemdangdi aser asenoki Tsüngrem mepelatsüsa ochimashi, tashiyim aser azü apong mapatem inyakba nungi piladi. Asenokbo asen taküm aser jakla nung khen asüngtetshidi, kechiyong asenok kanga memerük kümogo. Iba amaisa asenok libalirua ora, asenok ajak bendanger küboki aitsü aser tanü aseni inyakba ajak ya asüng bendanger meyong akümtsü. Tang asenok akaba tajungtiba, Chief secretary ka aliba Kiburi bener ogo, ashiko asenoki asenoksasa aseni inyakba lenmang tamajungtem nung yagi mepilara ano asenok nungi asen nungdakba purtem anojungi bener aotsüsa akok. Aji oda, asenoki tapu aika bilemyonga, asenok nungdak nung amshitsüsa asenok rongnung teyarir aser lenir melira asenoki kecha mesütettsü. Iba teyarirji Tenüngsang Ken 121 nung ashir, Kibuba nungi arur. Asenok taküm madak kiburji asenok masü, teyanglur kibur ka lir, anungji asenok nisung shiai aji meteta kibur pelatsüsa asenoki litetra, Pai asenok yaritsüsa lenir yoktsü. Atangji, asenok yaritsü yokba lenir ka mali asenok kanga azünga kümogo. Asenok tulusürtema aser tilartema temulung meyipdi aser Kibubai asenok dak saloktsüsa asenok lidi.

OLEMSABANG

NAGA YIMDEN LATET TEBILEMTSÜ NUNG LAISHIR OLA

~ Rev. Nungshi Pongen, Aliba & Rev. Dr. Wati Longchar, Serampore

Laishibai sayuba ama ochi nung Naga lima yanglushitsü nungdak ta ajiteta temulung "Yanglushidi Sensaksem Sabang (YSS)" ta telok ka tenteta mapang shia shisadokden sensaksem akar. 2021 küm mezüngbuba shisadokden omen "Naga yimden latet tebilemtsü nung Laishir ola" nung Prof. Imchayanger, Dr. Sentiwate Aier, (Dr.) Shiluilenla Jamir aser Rev. Dr. Alem Lemtur parnok pezüi jembia liasü. Parnok den semloka sensaksem lenir Dr. Lolen, Pastor (ABAM President) aser Mrs. Lemdila Peter, Mokochung yim, tenatia tanü Naga lima tebilemtsü, teraksa aser teyanglushitsü? aika benoka jembia. Saka yangi shisadokden nung lemsatepba olong kar lemsar.

YSS nung adener ajak ola kaji Naga lima tejakleni odaktsünera ochi dangi meyiptsüla. Aji Laishir aser arogoi anir ainkar ochi ola adoktsü mapang tongogo. Naga yimden telatet indang jembia arur joko küm 70 jungogo, saka tanü tashi yimden latet kati marutetbaji ochimashi aser telungjem maliba ajanga lir. Sen meimba, tenük merem aser kin-ka anati dang lenisüba amokbanger yunüba jakla ajanga telemsa adoker. India nung dang aitsütsü nungdak madoker, saka Naga nung Tsüngrem bushia ochi dangi meyiptsüla. Ochiba kimong sür yimden meyanglushira, Naga nung aiatai jenjangi aitsü ana nung dang lir.

Nüchisoji Tsüngrem nungi tenzüker. Tsüngremi meimchir shia nüchiba nung yanglu, anungji shingaia Tsüngremi agütsüba nüchi senmangji agientsü makok aser arakmoka ayutsü makok. Alima yimden-yimli putu balala melenshia arur aser tarutsü nung nation-state tesendaktep, aser tanü asenoki beshiba loktii mulungba yimden yayim ya kobika, koda melenshia aotsü shiangaia meshitet. Ano nüchiso akaba kin/alinük ka atsüngteta bendanger yimsütsüba küboki anir aibaji alimai aitsür aser kin tulutemi tashiyim agi matsüngdoktsüla ta tangatetba nung aoba putu ka lir. Kobala yimden temelenshi arudir arung, Lai nung kechi ochi o zülua lir aji memelenshir. Anungji Lai tesayuba dak ajemdaker ochimashi mapa balala ajanga kin ka tashiyim agi arakmoka ayutsü merangba mapa aser asalendong anema ochi nung nokdaksü Laishirtemi metsübur. Ochi nung nokdaksü aser taküm tenla agütsütsü.

British nung marudang nungi, Naga nung bendanger yimsütsüba kübok kodanga lia maru aser iba putu "Naga" kin ta tejangja latet ka makai aru. Tetsü-tebou putu nungi Naga nung nüchi nung aliba, India nüchiso ngur külen tashiyim agi India yimsütsüba küboki anir ait ta aija jembir, aser aji tai ta ashitsü makok. Saka tanü putu nung Naga nung India den tesendakep maka aser teyari magi melitetsüba jenjang ka nung lir. Tarutsü putu Tsüngremi kechi mapang bener arutsütsü aji shingaia meshitet, saka tanü Gol aser nüchiso bushir sensaksem isab nung Naga nung nüchiso mangutsü. India teyari maden Naga nung tejakleni motettsü ta tema nung alir Naga sorkar aser telong nung alir anapronglai angateta, joko Naga yimden latet tatembang onük Naga nung wako (flag) aser Temzüng (constitution) balaka agüjang ta takhangba o atsütepda ta osang ajanga angazüker. Saka ibajia magütsütsü südi. Koba yimden latet südir arudir aru, Tsüngremi kija, lokti Tsüngrem mesükba nung yanglu. Tzü-mopung, ali sobaliba aser oshi balala moatsü. Itemji wazüka ayutsü nokdaksü. Lokti ka tejakleni odaktsütsü, yimjung yanglutsü aser lokti nung ochimashi, tashiyim mapa aser sensaker ajemoka yutsüba asalendong aser maparen anema Laishiri ochi kuli asütsü.

Nüchiso bushir, talisa NSCN-IM teloki, socialism or communist tesayuba aser maparen dak ajemdaker aotsü jembia arur. India-i Naga nung temzüng balaka ayutsüba baji memelatsü akok; melayonga Naga nung Temzüngji communism ideology amai bener odi asü nungbo Naga nung dak mapettsü. Temzüng kobai kija aser kin ka "freedom" alenbanga yudir ibajibo tai ta Laishirtemibo shiteter. Yimjung melena kiralongrar aika adoktsü aser iba jagi lokti nung taliang teraksa bener arutsütsü ta ajiteter.

Taoba mapang leniri "Nagaland for Christ" ta amshitsü lemtetbaji putu balaka, saka tanü putu yamaji amshitsüba baji tim masü ta ajiteter. Iba yagi tamangba aser yimden tepila maka amai sayur aser Yisu Khrista tenüng mashi nung amshiba ta sayur. Ano deobarnü mesüra benjongbentsü nung dokan lapoktsü-melapoktsü ozüng agütsüba ya tim masü ta NBCC aser ABAM-i koba sangdongogo aji shitak ta agizüker. Baptist tamangi sayuba ama, aser Laishibai yimden aser arogo tepila tejangja lateta ayutsü sayuba ama arogo aser yimden inyakyim aotsüla.

Naga nung yimden aser arogo nung "politics of exclusion", tetsür metendaktsüba ochimashi sobaliba ka lir. Naga hoho aser Ao Senden nung tetsür metendaktsür. Ibai ochimashi tera tulutiba ka ta angatettsüla. Naga nung nüchiso indangbo jembir, saka tetsür atsüngina yutsüba ochimashi indangbo mejembir. Koda sür 50 % nütsüng tebilemba magi Naga yimden latettsü? Iba ochimashi sobalibaji melenshitsüla. Iba "culture of exclusion and erasure" ya memelenshi nungbo tetsür atema nüchiso jenjang makatsü. Lai tesayuba tamendakdaji tetsür-tebur ajak nüchiso, ajak tekümtet ta asüba ya lir. Iba "inclusive" aser "justice" nung ajemdaker Naga yimden latet indang jembitsüba baji Laishir tangatetba lir.

Nagaland nung corruption ya tera nungi atsüteta meindokra, Naga lima tejakleni maotsü. Naga nung ajak Khristan dang, saka Khristan jakla mesayutetba ajanga alima raksar. Naga nung corruption nungi nüchiso tama angutsüla. Corruption anema Laishiri odia tasü ita pulpiter aser lokti balala ajak nungi jembitsüla. Talisa, tatashim nung temelenshi asoshi ochi ola adoktsü tim. Sen agi meyongnem ayokba, senso candidate ta tashiyim agi declare sür telok kati telok ka arishitepba, senso nungi aridokba, züktepba, ki-o-jen raksatsüba, coup asüba mapa tamajung yagi Naga lima nung lokti mulungba yimden bener mouteter. Ya mojing mapa ta angatetdi. Takar, yim tulu, kidong tulu, jopurjosti inyaktetteri dang tata menden nung amentettsüsa mapang ka bener aruogo. Anungji corruption nungi, talisa election temenen nungi, koda nüchiso ngutettsü iba indang maneni February, March aser April shisadokden akatsü terenemba agiogo. Tatashim temenen anema Laishirtemi nokdaksü olemtep akatsü aser ajaki shilem tajung agidaktsüner ta ayongzüker.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Bangladesh nung Garo Khristantemi sorkar anema longkak ait



January 25, 2021 nü Bangladesh nung Garo Khristantemi longkak aitba noksa nung angur.

January 28, 2021: Central Bangladesh nung Arogo ana nungi lisopur Khristan noklang aikati sorkar inyakyim anema longkak aitogo.

'Wazüka ayuba arem' ta shia sorkari lisopur meyirjang aika yimdak nung mindoktsü sentong yangluba anema Khristantemi longkak ait.

January 25, 2021 nü Khristantemi Tangail district kübok Madhupur area nung teka amteper sorkar inyakyim anema longkak aita liasü. Parnokisa district sorkar ketdangsertem ajanga Ato kilonser, Sheikh Hasina nem temepishiba shidi ka agütsüogo.

Longkak aitertermi, "Onok liji ozü Ojala lir, anungji onok ket nungi ali merakzükdaktsütsü" ta ozülü amer parnoki longkak ait.

2016 küm Forest & Environment Ministry-i Madhupur nung ali acre 1,945 ji wazüka ayuba arem asütsü, ta sangdonga liasü aser sorkari iba maparen tenzüka yimtsüngtem nungi yimdaklirtem mindoktsü

atema inyaker.

Madhupur kübok yim 13 lir aser item yimtsüng nung Garo Khristantemi Corpus Christi Catholic Arogo aser St. Paul's Catholic Arogo nung züngsemtem lir.

Tawa Parliamentary standing committee, Forest and Environment Ministry-i sorkar dang January 30 tashi nungbo yimdaklirtem dang item yimtsüng toktsür aotsü metetdakjang ta mepishia liasü.

UCA osangbener den jembidang Garo Catholic aser Joenshahi Adivasi Development Council nung Tir, Eugene Nokrek-i, "1962 küm Pakistan kübok aliba mapang nung sorkari iba area ya reserve forest ta sangdonga liasü, ajisüaka yimdaklirtem aika item yimtsüng nung küm noklang aika lia arur. Ozüng kübok akhidang nungi onoki aliba onok li nungi onok mindoktsü makok. Onoki sorkar inyakyim anema maneni longkak aittsü," ta metetdaktsü.

Sorkari yimdaklirtem dang item yimtsüng tokjang ta sangdong agütsüba sülen January 31 nüa onoki longkak aittsü, ta paisa metetdaktsü.

Khristan putirtemia yimdaklirtem pusemer.

"Küm aika linük nung lisopurtem dak tim mesüi inyaker aser tang atalokba yaa tatishitsü rongnung ka lir. Lisopurtemi arem anepalur saka sorkari pusema nisung kari arem raksatsür. Onoki akokba tashi yimdaklirtem nungittsü," ta Khristan lenirtemi metetdaktsü.

2000 küm nunga tribal nisungtemi mepishiba mangai Forestry Department-i Madhupur nung ali hectare 1,214 nung forest conservation & eco-tourism project tenzüka liasü.

Iba project anema longkak aitba mapang nung 2004 küm lisopur ana khaset aser aika yiruja liasü. Tribal nisungtemi longkak aitba ajanga kasa küm (2004) nungjisa sorkari iba project anentsüsa aküm.

Khrista osangtajung proktsü mapangji tang mapang ya lir: Nick Hall

January 28, 2021: Sayutsüngir, Nick Hall-i, alima putiotsü nung Khrista osangtajung proktsü atema Tsüngremi maongka tajungtiba agütsütsü asoshi coronavirus wara amshi, ta ashi.

Nick Hall-i evangelistic organization- Pulse tenzüc aser iba organization yagi alima nung lanurtem dak rangloker inyaker.

Osangbener den jembidang pai, coronavirus wara mapang nung alima tesem ajungalen nisung aikati Khrista osangtajung agizüktetogo, ta ashi.

"Alima nung Khristan yimsü putiotsü nung osangtajung proktsü atema maongka tajungtibaji tang mapang ya lir, ta ni bilemer," ta pai ashi.

Covid wara mapang nung Billy Graham Evangelistic Association, Global Media Outreach aser Cru-ia nisung

aika Khrista dangi anir arutetogo.

2020 küm February ita nung Nick Hall'er aianu ka cancer tashidak agi asü, iba dak sendakba nung pai, "Mangyim jashi ajanga tangari ajangshiba ka ni-a ajangshiogo. Tasüba marok ya kanga tashi, timtem ya kanga tashi. Kü aianu dak teimla liasü aser la asütsü mapang tashi nunga la dak tepela liasü," ta ashi.

2020 küm Pulse teloki Easter hopta kija nunga linük 140 kübok kibong million 120 dak tema den Khrista osangtajung lemsatepogo, aser item rongnungjagi nisung 130,556 bo Khristan aküm, ta paisa metetdaktsü.

"Yaküm Khrista osangtajung sentong repringertemji (views) tesüiba küm 15 nung repringer dang nungi timba liasü," ta paisa shisem.

2020 küm alima tesem ajaklen rongsenkettsüng tsütsü timtem ajuruba dang masü saka mozü agia taneptsü manguba aser temelungjang nung tesünep maliba agi nisungtemi Tsüngrem dangi meyipa liasü. Tenla kidang nisung madenshiaka online ajanga Tsüngrem O angar aika liasü, ta paisa metetdaktsü.

"Internet ajanga ministry mapa inyaker. Khristantemi alima tesem ajaklen lanurtem den Khrista osangtajung sangdongba nung shilem tajung agiteter. Tanü lanurtem ya internet amshia intetertem lir.

Nisung ajaki Lionel Messi meteta lir. Nisung ajaki Justin Bieber meteta lir; ajaki K-pop meteta lir. Russia nung 'Call of Duty,' game asayaba agi English oshi metetba tanur aika lir. Yamaji internet ajanga Khrista osangtajung ajaklen proktettsü," ta paisa shisem.

ANOGO ABEN TSÜNGREM DEN

Nenok tesangwa

Mathi 5:16

Tammangdak tesangwa agütsübaji aibelen mapa masü. Tesangwa tasü ita Pa aliba metetdaktsür aser ammag süshidaktsür. Tsüngremi na tesangwa agi nungdaktsüner. Ne taküm kuli agi ne taküm nung Pa atenba aser Pa ain akaba na meketa alirtem dang sayudaktsüner, idangji na meketa alirtem dak nungi Tsüngrem sentsüwangshi tesangwa ajanga ammag aritoktsü.

Na meketa alimaji tammangba tammangba kümra, ammagji taittsü! Ibaji tongmelang agi ammagi kechi inyaker aji inyakerdang. Ammag anebtsübaji tesangwa dang lir. Alimaji tammangba kümra tebilemstüji ammag nungji mali. Tebilemstüji tesangwa den lir. Yisui Pa nütsüngtemji "Alima tesangwa alitsüla" ta ashi (Mtt. 5:14). Koda mapa tulushiba ajanga Tsüngrem tesangwai sangwadaktsütsü aser meketa alirtem nungi ammag aritoktsü. Yisui Pa aruba metetdaktsür dang ashi, "Ammag nung alirtemi tesangwa tulu ka nguogo. Aser Shirnok tasü akhüm nung mena lir tesangwa yaloktsüogo" (Matt. 4:16).

Alimai Khrista aruba memeteti mali! Ammag süshidaktsür! Yisu aolen ajak nung tasü ita Tsüngrem ochiba sangdong, nüburtem anebtsü, anemsü temai adoktsü aser temenen pur tatok angu. Tebui pei chir ajanga tesangwa Agütsüba agi alimaji melenshi. Ne danga ibaji shitettsü akok asü? Ne den külemi inyakertermi ne dak aliba tesangwaji metetta lir ma? Khrista tesangwa ner kidang aliba ajanga ner kiyonger sangwatsüdaki ma? Kodang Tsüngremer tesangwa menokdangi ne taküm ajanga yaluktsüdir na meketa aliba ammag süshitsü.

2030 tashi nung China nung Khristan nütsüng million 300 ajungtsü

January 28, 2021: Strategic Research of Open Doors Director, Dr. Ron Boyd-MacMillan-i, China linük nung reshikangshi liaka Khristan nütsüng kanga renlokdar, aser 2030 küm tashi nungbo iba linük nung Khristan nütsüng million 300 ajungtsüa akok, ta metetdaktsü.

Osangbener den jembidang Boyd-MacMillan-i, China Tir, Xi Jinping kübok Chinese Communist Party-i Khristantem kanga reshikangshir, kechiyong parnoki China nung Arogo züngsem jenti renlok ta tsübur, ta metetdaktsü.

"China nung sorkari Arogotem anema inyaker kechiyong Arogo kanga ainer renloker," ta pai ashi.

"1980 küm nungi tenzüka Khristan nütsüng renlokba ama maneni küm nung shilem 7-8 renlokra 2030 küm tashi nungbo China linük nung khristan


nütsüng million 300 ajungtsü," ta Boyd-MacMillan-i metetdaktsü.

"China lenirtemi tarutsü atema asalentong yanglur. Parnoki 2049 tashi atema rongsenkettsüng asalentong yanglur, ibayongji parnok kanga shisabulur, kechiyong Arogo maneni inra parnok tsüngda (sorkar aser Arogo) tashi lemsateptsüsa akümtsü," ta pai ashi.

2020 küm coronavirus wara liaka küm piyong China ketdangsertemi linük nung Khristantem anema inyaka aruogo.

Taoba ita Release International-i, 2021 küm Khristantem anema ano tamajungba inyaktsü linüktem rongnung China densema lir.

Open Doors USA-i ashiba agi, tang alima nung Khristantem tamajungtiba reshikangshiba linük 50 rongnung China jenjang 17buba nung lir.

OLONG PAITEP # 5708**TIPIEN**

1. Yakob tetsü - (6)
4. Mezüng nisung - (4)
6. Tasen lai kakat ka - (5)
9. Au lanu - (2)
12. Tejen lai 21 buba - (11)
15. Tekolak tembar - (2)
16. Zütsüra anepsang - (5)
17. Kain tenu - (4)
18. Hana-er jabaso - (6)

LANGTSÜNGLEN

2. _ _ _ gki - (3)
3. Telungpur telok ka - (2)
5. Tsüngremi mezüng poktetdaksüba - (5)
7. Tia - (4)
8. Yakob-er jabaso ka - (5)
10. Abraham tebutü - (4)
11. Rebeka kinungpu - (4)
13. Esau tenu - (5)
14. Tzünglu tilala aru - (4)
16. Jafet tebu - (3)
17. Teka agi kongshi - (2)

OLONG PAITEP # 5707 TELANGZÜBA**TIPIEN :**

2. Pongsen, 5. Lepko, 7. Omen, 8. Maongka, 10. Yangkhu, 12. Senpong, 14. Angu, 15. Raksa, 16. Arameso,

LANGTSÜNGLEN :

1. Alimang, 2. Pongen, 3. Samaru, 4. Nün, 6. Pio, 9. Nüngdak, 10. Yongya, 11. Kongro, 13. Ora, 14. Ata.

Agüja aliba noksa nung meputepi aliba 10 bushiang**TANÜBO NAI LANGZÜANG**

Q. Ayong koba nung Ratle Hydropower project yanglua lir?

A.R.Chenab

B.R.Beas

C.R.Ravi

D.R.Sutlej

===== (Taruba adok nung onoki langzünsü)

YASHI ADOK TELANGZÜBA : Jodhpur

Tanur asoba anogo nung salem osang den noksa angati adokdaksünura - Tenüng, Küm, School, Talidak & salem osang tejanga zülur, noksa (photograph - any size) ka den anogo 3 mesüra 4 jelia e-mail : tiryimiyim@gmail.com nung yokang mesüra Tir Yimiyim bureau tem nung agüjang.

1. Tenüng :
2. Tasoba anogo:
3. Küm : 4. Class :
5. School :
6. Talidak :
7. Salem osang :

Tepela Tasoba Anogo**NAI-A YA METETTER MA?****AMAZON PRIME AJANGA SAYUBA SHOW TAJUNG****KAR: JANUARY 2021**

How I Met Your Mother	Hannibal
American Horror Story	Fleabag
Upload	Scrubs
Dexter	Orphan Black
The Marvelous Mrs. Maisel	Bones
The Wilds (2020)	The Boys
The Bernie Mac Show	Utopia
The Expanse	Luther
Ray Donovan	Downton Abbey
The Affair	Tales from the Loop
Tom and Jerry Tales	The Man in the High Castle
Small Axe	Comrade Detective

SUDOKU # 5749

5				2				6	4	5	9	7	1	2	3	6	8
2				8	3	6	4	5				2	1	7	6	8	3
	3			4	5			7				6	3	8	9	4	5
	2	3	7	5	9							5	8	4	1	3	7
	4			1	3			2	9			3	2	1	4	6	9
	1			2		4	6	3				7	9	6	5	2	8
3	9	8	4				1		5			1	7	3	2	5	6
	6				1				3	9	6	5	8	7	4	1	2
7							9		2	8	4	2	3	9	1	6	7

TELANGZUBA # 5748**OJANG LUTEP # 5296**

CHKEI	:				
MASAPA	:				
IKDNYAIR	:				
MASTAA	:				
GAGJUNJUN	:				
TETAM	:				
SHITA	:				
ADANGSHISER	:				
ÜKNLA	:				
ADOKYUANG	:				

OJANG LUTEP TELANGZÜBA # 5295

TEMULUNG LEMTETBA NISUNGJI KODANGA TANGARI MEZÜNGMESHI
MASÜTSÜ ASER TSÜNGREMIA MEIMER

TAN HOPTA ATEMA - KOMA SÜLA ?**Q. Nagaland nung ya Assembly constituency 40 dang aküm nunga süla ?**

Olong 20 shi nung January 20, 2021 tashi nung iba telangzüba ya onok dangi (e-mail - tiryimiyim@gmail.com) :
(SMS - 9856121232 / 9436072422) : (WhatsApp - 7005723372 / 8729995804) : (tiryimiyim.in) ajanga yokang. Telangzübatemji taruba Honibarnü adoktsütsü.



New Delhi, January 28, 2021: Brihostibarnü New Delhi nung National Cadet Corps (NCC) Rally nung Ato kilonser, Narendra Modi adenba noksa nung angur. Kasa noksa nung DG, NCC, Lieutenant General Tarun Kumar Aich-a angur.

Opp. party 16-i Parliament nung Tiri jembiba sentong nung madentsü

New Delhi, January 28 (Agencies): Brihostibarnü opposition party 16-i külem sangdong ka ajanga, tang aluyimertemi longkak aitba nung ajemdaker January 29, 2021 nü Parliament House anaprongla nung linük Tiri jembiba mapang nung parnoki madentsü, ta sangdong.

Opposition party temi aluyimertem pusemer aser aluyimba ozüing tasen asem agentsü akhangar, ta parnoki metetdaksü.

Rajya Sabha nung Opposition lenir, Ghulam Nabi Azad-i, opposition party temisa Republic Day nü linük yimtiba, Delhi nung rara adokba nung Centre sorkari shilem agia alibaji jurila telok ka nem bushisüingdaksütsüla ta takangba agütsüogo, ta metetdaksü.

Opposition party temisa aluyimba ozüing tasen asem agienang ta metetdaksüba den

külemi aluyimertem lakh aikati longkak aita aluyimba ozüingtem agentsü akhangyonga Centre sorkari telangzüba magütsüba atema sorkar aitsür, ta ashi.

Hokolbarnü Parliament House anaprong külem senden nung Tiri jembiba mapang nung madentsü lemtetba party temji-Congress, Nationalist Congress Party, National Conference, Dravida Munnetra Kazhagam, Trinamool Congress, Shiv Sena, Samajwadi Party, Rashtriya Janata Dal, Communist Party of India (Marxist), CPI, Indian Union Muslim League, RSP, Peoples Democratic Party, MDMK, Kerala Congress (M) aser All India United Democratic Front party tem lir.

Opposition party temi külem sangdong ka ajanga, "Ato kilonser aser BJP sorkari tekong meranger aser democratic inyakyim nung aliba ama meinyaker. Sorkari inyakba agi

süingmanga opposition party temi aluyimertem anema benokba ozüing asemji agentsü akhangba den külemi India nung aluyimertem pusema Hokolbarnü, January 29, 2021 nü Parliament House anaprong nung Tiri jembidang madentsü lemtetogo," ta metetdaksü.

Osangbenertem den jembidang Congress lenir Azad, deputy lenir, Anand Sharma aser Lok Sabha nung Congress chief whip, K Suresh nungeri, BJP sorkari benokba ozüingtem anema aluyimertemi longjemir longkak aiter, ta metetdaksü.

Opposition party temisa, aluyimba ozüingtemji states mesüra aluyimer union shinga dena melemsatepi sorkari parliament nung benok, ta aitsü.

Parliament nung Budget senden jakdang January 29 nü linük Tir, Ram Nath Kovind-i Parliament House anaprong külem senden nung jembitsü.

India nung ano nisung 11,666 dak Covid putet aser 123 asü

New Delhi, January 28 (Agencies): India nung ano nisung 11,666 dak coronavirus tashidak putetba sülen linük nung coronavirus case ajak agibo 1,07,01,193 jungogo, ta Brihostibarnü Union Health Ministry-i metetdaksü.

Linük nung coronavirus tashidak agi shiranger ajak agi 1,03,73,606 anepogo aser shirangertem anepba shilem

96.94 jungogo.

Tesüiba ghonda 24 tsüingda linük nung iba tashidak agi shiranger 123 süogo aser iba tashidak agi asür ajak agibo 1,53,847 jungogo. Coronavirus agi shiranger shilem 1.44 süogo.

Tang linük nung iba tashidak agi teshirangdakupur 1,73,740 lir aser ibaji coronavirus caseload nungi shilem 1.62 dang lir.

India nung August 7 nü

coronavirus case lakh 20 ajung, August 23 nü lakh 30, September 5 nü lakh 40, September 16 nü lakh 50, September 28 nü lakh 60, October 11 nü lakh 70, October 29 nü lakh 80, November 20 nü lakh 90 ajung aser December 19 nü crore 1 junga liasü.

ICMR-i ashiba agi, January 27 tashi nung linük nung samples 19,43,38,773 tendangogo.



January 28, 2021 nü New Delhi nung aluyimertemi Ghazipur arrtsülen aluyimba ozüingtem anema longkak aitdang security sepaitemi flag march agiba noksa nung angur.

AAP-i state trok assembly elections nung tokteptsü: Kejriwal

New Delhi, January 28 (Agencies): Brihostibarnü Aam Aadmi Party (AAP) national convenor aser Delhi Chief Minister, Arvind Kejriwal-i, AAP-i state trok- Uttar Pradesh, Uttarakhand, Goa, Punjab, Himachal Pradesh aser Gujarat assembly elections nung tokteptsü, ta metetdaksü.

Kejriwal-i, "Taruba küm ana tsüingda AAP-i state trok- UP, Uttarakhand, Goa, Punjab, Himachal Pradesh aser Gujarat elections nung tokteptsü," ta metetdaksü.

9buba Aam Aadmi Party National Council senden nung jembidang pai, "Tanga party tem mangdang mali, ibayongjji parnoki tesüiba mapangtem indang dang jembir. Tarutsü

atema jembiba party jibo AAP dang lir aser AAP-i Aso 21buba aser 22buba atema-a mangdang yur inyaker," ta ashi.

Kejriwal-isa AAP züingsemtem dang linük nung party ulushitsü atema grassroots level nungi tashi aittsü atema meranga inyaksü ayongzüka liasü.

"Linük nung party ulutsü atema ni party züingsemtem dang grassroots-level nungi tashi aittsü atema meranga inyaksü ajungshir. Iba organisation ya tashi itta tuluba akümtsüla. Asenok atema iba linük ya kanga tongtiban, anungji party renloktsü atema asenoki meranga inyaksü nüngdak," ta party tongti, Kejriwal-i ayongzüik.



Ajmer, January 28, 2021: Brihostibarnü Rajasthan Municipal Election agidang Ajmer nung aliba polling station ka nung vote agütsütsüpurtem pilar nokdaka aliba noksa nung angur.

India-i Sri Lanka nem coronavirus vaccine lakh 5 sempet agütsü

New Delhi/Colombo, January 28 (Agencies): India-i Sri Lanka nem coronavirus vaccine dose lakh 5 angati agütsüba sülen Sri Lanka Tiri pelaa agizükogo.

India linüki region nung linük 8 nem coronavirus vaccine tenla agütsür.

India nung Serum Institute of India-i yangluba Oxford-AstraZeneca vaccine ya India nunga amshi tenzüka mezüingbuba shilem nung health workers aika nem agütsüdar.

Sri Lanka lenirtemi ashiba agi, linük nung health workers 150,000 aser sepai den police 115,000 nem tama Colombo nung aliba hospital trok nung iba vaccine agütsütsü.

Item hospital rongnung kabo Covid-19 agi shirangertem yaridar aser tanüingba hospital tem nungjibo coronavirus agi shirangertem atema temeja ward dang lir.

Sri Lanka nung Health Ministry-i vaccination campaign ya hospital aser health centres 4,000 nung agitsü sentong lir.

India-i agütsüba vaccine dose lakh 5 jagi nisung 250,000 dang peritsü, anungji Sri Lanka-i ano India dang nungi vaccine

aika alizüktsüsa akümtsü.

Sri Lanka-i Pfizer-BioNtech vaccine dose million 2 order süogo aser maneni dose million 3 mangatsü bilemdar.

Yaküm October nung Sri Lanka nung ano tanaben iba wara sashia prok. Süoshi yangluba factory ka aser ango ayokba market ka nung ano tanaben iba tashidak proka liasü. Iba mapang nungjagi tenzüka linük nung ano nisung 55,000 dak coronavirus putet aser nisung 260 süogo. Tang Sri Lanka nung anogo shia nisung 500 nungi 900 dak iba tashidak putetdar.

Brihostibarnü tayimtsü anenba tesem nung Sri Lanka Tir, Gotabaya Rajapaksa-i vaccine agizükba mapang nung India Foreign Ministry-i sangdong ka ajanga, "Region nung India-i first responder shilem agiogo," ta metetdakja liasü.

Tamalen India-isa Sri Lanka nem US sen million 400 indang swap facility ka agüja liasü.

Bodhbarnü China-ia, taruba ita China-i Sri Lanka nem coronavirus vaccine-Sinopharm dose 300,000 agütsütsü, ta sangdongogo.



Bishkek, Aenjeti/Jan 28 : Kyrgyzstan yimtiba, Bishkek nung January 28, 2021 nü Sadyr Zhaparov (tiyong) o jembidang tangokba noksa nung angur. Sadyr Zhaparov ya Brehostibarnü Kyrgyzstan tir kümogo. Pa ya Kyrgyzstan indang tir trokbuba asütsü.

Indonesia nungi Rohingya nunger noklang aika samaogo

Lhokseumawe, Aenjeti/January 28 (Agencies): Indonesia nung refugee camp ka nungi Rohingya nunger noklang aika samaogo aser parnok ya anasa aliba Malaysia-i shibelena ao südi, ta amanger, ta ketdangsürtemi ashi.

Indonesia north tsütsü tzükumlen Lhokseumawe nung khen atema yangluba camp nung tain hopta refugee 112 dang anünga liasü, kong taoba küm June aser September ita tsüngta nisung 400 jungnüa arua liasü.

Myanmar nungi tejangja maliba Muslim nunger refugee tem ya kong aliar yangji aliba ketdangsür mesüra United Nations ajanga meshiteter,

shirnok nisung shibelener temi Malacca strait ajanga Malaysia-i anir ao südi, ta ashir. "Onoki tang tashi parnok kong aliar memetet. Saka parnoki tapok ka danga ngura jena aotsü, kechiaser aji par nükjidong lir," ta Lhokseumawe nung Rohingya task force tekolakba, Ridwan Jalil-i ashi.

2017 küm Myanmar mitkartemi tashiyim amshiba ajanga Rohingya nunger nisung 750,000 arrtsü alema oa Bangladesh south tsütsü tzükum anasa aliba Cox's Bazar nung jenok, kong parnok aika refugee camp tulu aser memürek nung anenzük, koba kin samatsütsü atema inyakba lir, ta UN

bushisüngdang temi ashir.

Iba sülen parnok meyrirjang aikati Bangladesh nungi anir aotsü atema shibelener nem senotsü agütsür Indonesia mesüra Malaysia-i aotsü atema tzüym nung ita junga munga shiranga senzüba den shibelener temi züka merenshi aser yasa-tzüra senzür.

Medan yimti nungi kilometer noklang aika pilar police temi Lhokseumawe camp nungi Rohingya nunger 18 den shibelener ter dak tema police temi apu.

Refugee tem dang camp yutsür maotsü shia liasü, kechiaser parnok senzüba lenmang nung lendong lir, ta UN indang refugee agency ajanga ashir.

75th Birthday

Wb. Sosangmar Lemtur, Longmisa



Temeim oba, na onok akümdong; tanü tashi na onok mulung ayudak; nai nü taküm bendanga agüja onok anitetogo. Tsüngremi, ano, onok asoshi nü nem anema aliba arishi anogotem maneni moajangma ta onok ajaki na asoshi sarasademtsür.

- Temeim Kinungsü, Jala Jabaso & Semchirtem.

China-i Taiwan amokmeren

Beijing, Aenjeti/January 28

(Agencies): Tawa Taiwan temeket nung military inyakyim tali benoka inyakaba sülen China-i Brehostibarnü Taiwan amokmerena, "nüjiso tetezü rara" ta shiogo aser China nunger armed force temi bendangeri parnok inyakyim nung jushiba aser parnok mesüshiba atema jenjang tapet agidar, ta ashi

China-i Taiwan ya parnok meyong ta ashir aser parnoki hopta tsüngda Taiwan indang southwestern air defence identification zone leni fighter jet aser bomber tem aika yoka arudar aser iba ajanga Washington tebilemstü kadaktsür.

China-i, Taiwan indang democratically-elected government yagi iba asetkong ya nüjiso nguogo ta sangdongtsü atema jenjang agidar ta amanger, ajiüsüa tir Tsai Ing-wen-i, parnok nüjiso nguadokogo aser parnok dang Republic of China ta ajar ta aiben shia arudar.

Tawa air forces inyakyim indang asüngdangba mapang Chinese Defence Ministry spokesman Wu Qian-i, Taiwan ya China nung shilem ka aser pilatsü makok, ta ashi.

"Taiwan Strait nung Chinese People's Liberation Army inyakyim ya Taiwan Strait nung security jenjang apir kanga nüngdaka lir aser iba den linük sovereignty aser tekümzükbba nung toktsütsü nüngdaker," ta pai ashi.

U.S. indang raradang amshiba rong telok ka, tzüym nung tetsükdaktsü makai senzusenpong ajungkettsü atema mangatetep adoker aliba South China Sea-i aiba mapang kasa nung China nunger inyakyim den tenchitepogo.

Wu-i ashiba agi, Taiwan nung nisung ishikati asetkong nüjiso atema inyaker.

"Onoki item nisungtem amokmerener. Shirnoki mi den asayadir parnok sasa arongtsü aser Taiwan nüjiso tetezü rara asütsü," ta pai shisem.

Saudi Arabia, UAE dang nok-o-nü ayokba Biden administration-i anenja atar

Washington, Aenjeti/January 28 (Agencies): Taoba Tir Donald Trump-i temelaba agütsür Saudi Arabia aser United Arab Emirates (UAE) dang nok-o-nü ayokba United States-i tanaben asadangshir, koba administration tasen yimya ka dang lir, ta Secretary of State Antony Blinken-i ashi.

Pai osangbener den Bodhbarnü mezüngbuba jemidang, mapang ka asen nükjidong ataloktsü aser asen foreign policy tejakleni aotsü atema inyakba asadangshitsü nükjidong nung iba mera ya agi, ta Blinken-i ashi.

"Tang asenoki ibaji inyaker," ta pai osangbener dang ashi.

Saudi Arabia dang precision-guided munitions aser UAE dang F-35 fighter tem densema sen dollar billion aika jenjang nok-o-nü ayokba Biden administration-i khen atema soita atar, ta Wall Street Journal nung Bodhbarnü sangdonga liasü.

Biden, shibai Washington aser Riyadh tesendaktep khen

asadangshitsü ta nangzüka liasü, pa US tir inyaktü tenangzüktep agir hopta ka lir iba temelenshi ya arur. Office nung amenba sülen pai Trump indang sentong tongtipangtem reprangshitsü mesüra melenshitsu atema totuyuba agütsü.

Israel akhang akhanga nungitba den külemi Trump-i UAE aser Saudi Arabia den tesendaktep tajung yanglu aser Iran anema nokdak.

Saudi Arabia, UAE aser Jordan dang sen billion \$8 jenjang nok-o-nü ayokba atema Congress nungi tai apuba paidoktsü mechi taoba US tir-i 2019 küm May ita Iran den mangatetep aliba mechi national emergency sangdonga liasü.

Trump administration-i taoba küm December ita tatemlen Saudi Arabia dang sen million \$290 jenjang munition tila ayoktsü temelaba agütsü.

UAE dang F-35 fighter jets aser armed drones tem densema sen billion \$23 dak tema indang advanced weapons system ayoktsü melaogo, ta

Trump administration ajanga Congress dang November ita metetdaktsü.

US tetsüngtai ia tenangzüktep ka agiba nung Emirati sorkari Israel den tesendaktep tajungba akumtsü ta molungteper mapang tatsüka lir iba osang ya sangdonga liasü.

"Ibai UAE den asen tesendaktep akhangshiba aser Iran nungi timtem ajuruba mapang parnok kumzüksü aser nokdangtsü asoshi advanced

defense capabilities nungdakba mechi lir, ta iba mapang US Secretary of State inyaka alisang Mike Pompeo-i shia liasü.

Rights group temibo item raradang amshiba hadir ayokba ya aitsü aser iba ya ajanga region nung rongrong tali adoktsü, talisa Libya aser Yemen nung, kong UAE aser Saudi Arabia nati Houthi tsükchir den rara tesashi rara liasü.

Nok-o-nü agütsüba atema Republican aser Democratic

telok nungi ozüng yanglurtemi aitsü aser iba ya ajanga lendong aketba 'arms race' tenzükdaktsütsü, ta ashi.

Telok anaprong nungi legislator temi iba tezüngzüktep anendaktsütsü atema pangzüng ka yanglutsü merang, saka US Senate nung takok mongutet.

Kasa mapang Trump-ia nok-o-nü ayokba anendaktsütsü atema Congress nung mera agiba ajunga agientsütsü, ta amokmerena liasü.



Colombo, Aenjet/Jan 28 : Sri Lankan Tir Gotabaya Rajapaksa-i Colombo nung India-i yangluba COVID-19 mozü doses 500,000 dak tema agizükba mapang tangokba noksa ka yangi angur.

Tetseo Sisters-i Mission Paani Waterthon nung shilem agi



Kohima, Aenjeti/January 28, 2021 (TYO): Mongolbarnü (26.01.2021) Mumbai yimti nung Mission Paani Waterthon sentong agiba mapang, Nagaland nungi nüngtugu kentener telok - Tetseo Sisters-i Paani Lizo (The Water song) ta nüngja agütsüba ken tasen ka tenloktüsü.

Panni Lizo ya oshi asem - English, Hindi aser Chokri Naga nung atenba ken ka lir, koba tzü kümdanga/apayua amshitsü, tzü temerük ajemtsü aser temang merüka ayutsü atema tekümdangtsü sangoktsütsü aser iba mapatong nung sensopur ajaki shilem agitsü ayongzüktüsü asoshi iba ken zülua liasü.

CNN News18 aser Harpic India na longjemer tenzükba Mission Paani mapatong ya India nung tzü/tzü adokdak kümzüka ayutsü aser merükmejua alitsü yimya süpatsü asoshi drive sentong ka lir.

January 26, 2021 nü, ghonda

8 atema Mission Paani Waterthon sentong ya LIVE sayaa.

Mission Paani Waterthon sentong nung, tzü kümzüka ayutsü aser merükmejuba maparen ajungkettsütsü asoshi bendanga inyaker tongtimbang nübu, Lt. Col. SG Dalvi dena liasü. Tzünglu tzü bendena ayutsü asoshi pai anir mapatong tasen ka tenzük. Ano külen, India nung tzü peria manguba timtem achaayangtsü asoshi inyaker, Amla Ruia-ia aruagi denogo.

Kasa sentong nung activist tem talisa, alima nung climate activist rongnung tanobusang Licipriya Kanjugam aser India nung tzü agi timtemba pungbadaktsütsü asoshi inyaker, Naina Lal Kidwai na denogo.

Iba sentong nung, tzü kümzüka ayutsü aser merükmejuba ajungkettsütsü asoshi inyakerter mapanga ngua terepranger aika ajungmesogo aser sentong nung classical

dance nung takoktet kati tsüingsangba densema nüngtugu danseuse, Mallika Sarabhai, Esha Deol aser tanga aikati shilem agiba ngua telok saksalemdaktsüogo. Kasa mapang, Mission Paani atema campaign ambassador, Akshay Kumar-i shilem agiba den külemi Swarathma and Indian Ocean aser Shaan nungeri parnok indang music sayaa.

Maneni, iba sentong nung tongtimbang nisung talisa Dr Harsh Vardhan, Union Minister of Health and Family Welfare, Laxman Narsimhan, CEO, RB Hygiene aser Gajendra Singh Shekhawat, Union Jal Shakti Minister nunger denogo.

Mission Paani Waterthon sentong, koba India indang Republic Day anogomung nung Network18 indang TV aser digital channel tem nung live saya, iba sentong ya tejangrar temi tanaben CNN News18 YouTube channel nung reprangtettsü akok.

Triumph-i India nung Speed Triple 1200 RS sayaogo

New Delhi, Aenjeti/January 28, 2021 (Agencies): India nung Triumph-i Speed Triple 1200 RS sayaogo. Iba motorcycle jenjang sen lakh 16.95 Lakh (ex-showroom) alitsü. 1994 küm Triumph indang mezüing Speed Triple sayaa liasü aser 2005 küm second-generation model saya, koba Speed Triple ya Speed Triple 1050 akum. 2018 küm, Triumph-i iba model ya version tajungba ama update sütsü aser 2021 model atema engine tuluba inoka yanglutsüogo, koba Speed Triple rongnung tashi tuluba model alitsü.

Iba model ya 1050 masü, saka Speed Triple 1200 RS ajatsü aser Triumph ajanga adokba flagship street-naked motorcycle ka alitsü. Triumph-i ashiba agi, Speed Triple tasenba ya top-spec RS version asünung, model ya 'R' mesüira 'S' variant nung mangutsü.

2021 Triumph Speed Triple RS ya model tasen ka ama lir, kong three-cylinder engine tasen ka angutsü. Iba engine tasazük 1160cc lir aser 180 PS power agütsür, koba 2018 model dang nungi 30 PS timba lir aser 125 Nm torque agütsür, koba taoba model dang nungi 8 Nm agi timba alitsü. Iba engine power aser torque anaprongla taoba dang nungi tuluba asütsü.

Triumph-i 1200 RS ya taoba model dang nungi seret 10 agi tajemba yanglutsü. 2021 Speed Triple 1200 RS nung 'power to weight ratio' ya 1994 küm sayaba mezüing model dang anasü agi

tashi tuluba lir.

Engine tasenba nung 6-speed gearbox, slip den assist clutch aser Triumph meyong quickshifter angutsü, koba upshifts aser downshifts anaprongla nung yarir. Triumph-i ashiba agi, model tasenba ya takaratiba, tepungba aser tashitaitba Speed Triple motorcycle alitsü.

Design tsütsü reprangdangra, Speed Triple 1200 RS tereprangtsü ya Triumph Street Triple 765 RS ama lir. Iba den, Speed Triple nung nüngtugu under-seat exhaust mangutsü, koba 'mass centralisation' atema tajangzüük. Motorcycle nung cast aluminium frame tasen inoktsüogo, koba taoba model dang nungi shilem 17 agi tepungbaba lir.

Triumph-i ashiba agi, 1200 RS power achaayangtsü atema chassis tasenba ya design sütsü, saka Street Triple 765 RS ama ajangshitsü..

Kasa mapang, Triumph-isa rider ergonomics tsütsü yanglushio, kong handlebar talanng, tank tila angutsü aser iba den külemi seat profile aser bike cornering clearance taoba dang nungi tajungba alitsü.

Speed Triple 1200 RS nung feature talisa anti-wheelie, cornering ABS, koba cornering traction control mode asütsü; keyless ignition, keyless fuel filler cap, self-cancelling indicators, backlit switch cluster, lithium-ion battery aser cruise control inoka yanglutsüogo.

Item dak alaka, iba motorcycle nung 5-inch TFT instrument cluster tasen angutsü, koba rider temi riding mode pungo shimsü akok aser theme balala dena lir. Iba den külemi, screen nung sayuba information indang layout melena amshitetsü.

Triumph-isa, 1200 RS nung fully adjustable 43mm upside-down Ohlins front suspension aser tesülen fully adjustable Ohlins monoshock inoktsüogo. Braking maparen, twin 320mm front disc brakes ajanga achaayangtsür aser motorcycle nung standard ama Metzeler Racetec RR Tyre angutsü, koba Metzeler tyre rongnung spec temaba lir.

Maneni, India nung iba motorcycle ya Completely Built-up Unit (CBU) ama Thailand nungi bener arutsü.

Tuensang nung konger metsüh adokdaktsüba lab semzüük

Tuensang, Aenjeti/January 28, 2021 (TYO): Brehostibarnü, Director of Horticulture, Dr. R. Elithung matsüingdang Horticulture Department Tuensang-i office nung Mushroom Spawn Production Laboratory (Konger metsüh adokdaktsüba lab) ka semzüüktsüogo. Iba laboratory lapokba sentong nung Bhupam Phom, Deputy Director Horticulture, Agri indang HODs aser teloktep Department Tuensang, DRDA, ECS aser Tuensang indang aluyimertem dena liasü.

Iba sentong nung Dr. Elithung-i, state nung iba

MULUNG NEN O

Onoki teti meima aliba otsüla Asür **Impangchila** (Khensa) la taküm aliba mapang nungi tasünü tashi kidanger kiyongertem, kinunger, sensosanger, anükapang, medemertem aser temulungertem shirnokisa rongsen, nübo, shisatsü aser sarasadem agi nungita yariogo nenok ajak den onoki pelaba lemsateper.

~ **Temeim Semchir, Kinungertem.**



- Mulungchi O Lemsateper -

Asür tsürapur T.K. Yuden, Rtd. Teacher, Kangtsüng

TASOBA :
12.02.1926

TASÜBA :
24.01.2021

Onoki meima aliba tsürapur manem tenzükba nungi akümüli tempang tashi nung kija, kibong, lokti balalai aria bilema pei tashi rangben agi mungita yariba asoshi ajak dangi tsüingdong marutet nung iba osang ajanga kanga pelaba lemsateper.

Item rongnungi tenüing metetshi-i melitet nung pelaba kar yamai shisemer:

1. Aitlenden Baptist Arogo	9. Kangtsüng Baptist Arogo
2. Aitlenden Arogo W/Ministry	10. Kangtsüng Baptist Arogo W/Ministry
3. Aitlenden Youth Ministry	11. Pensioners Union
4. Kangtsüng Senso Telongjem Tuli	12. Arok Khu Society Tuli
5. Kangtsüng Kaketshir Telongjem Tuli	13. Grace Rehabilitation Home Tuli
6. Ardokmang Ward	14. Aopenzü Village Council
7. Kangtsüng Kaketshir Telongjem	15. Aopenzü Baptist Arogo
8. Kangtsüng Reongsanger Putu Menden	

Tejungnüba takümüji ka-a kümdaktsütsü, shibai tzü ainer pa daka tzü indaktsütsü. - A. Shin 11:25.

Nenok mapa tajung asoshi tulusang Tsüingremi maneni moajangma.

~ **Temeim Kinungtsü aser Kinungertem.**

TENÜNGSANG AGÜTSÜR

Dr. T. Imchanochitla Changkija, Vice Principal, Immanuel College Dimapur, mezüing semchir Mr. & Mrs. Late Barbana Jamir (Molungyimsen). Lai züluba thesis "Quest for Feminine Identity: A study of Selected Contemporary North-East Indian Writings in English" NIT, Nagaland nungi PhD jenjang ngutetba asoshi tepela osang lemsateper.

Tarutsü anogotem nunga ne shisatsü aser sempet tajung alima aser Tsüingrem wadang asoshi maneni arishia yujang ta ozü sarasadem.

Kinungertem

laboratory ya trokbuba alitsü, koba Ministry of Agriculture, Govt of India ajanga sponsor asü aser Department-i amenok, ta ashi. Pai ashiba agi, Horticulture inyakyim rongnung konger lu ayimba ya tajangzüük tulu lir, kong konger tsünütsü/anepalutsü aser bendentsü atema mapang magir. Konger ya chiyongtsü tajung ka lir, koba pei sasa tsünüa aser iba den külemi rongsenkettsüng atema anepalutsü akok. Tuensang nung konger meyidaktsüba laboratory yagi talir aser teinyaker anaprongla ajangzüktüsü.

Deputy Director Horticulture, Bhupam Phom-i, tejangrar temi training agitsü akok aser pei sasa

inyaktettsü atema nüngdakba konger metsüh ya meshitettsü; aser iba maparen yagi rongsenkettsüng tsütsü kanga teyari agütsütsü, ta ashi.

DAO Tuensang, K Showuba-ia, Tuensang nung aluyimertem atema konger metsüba ya mapatong tajung ka lir, ta ashi aser district nung iba ama terenlok mapa bener arutsü asoshi Agri aser teloktep Department ajak ajungshio.

Iba sentong nung Horti Inspector, Chemlila menden liasü aser Horti Inspector, C. Yongkonglimba-i tepela anküp o jembi, ta sangdong ka ajanga metetdaktsü.

IPL 2021: Mumbai Indians-i Khrievitso Kense tendangtsü atema jaok



Aenjeti/January 28, 2021 (Agencies): Mumbai Indians team atema asayartem tendangtsü/asadangtsü mechi teshimtet asayar ishika rongnung Nagaland nungi Khrievitso Kense densemogo. Arishi küm 16 tain Leg spinner Kense-i tang tasayadak aliba Syed Mushtaq Ali Trophy 2020-21 nung alakteta shilem tajung agiba ajanga aika atsüa aruogo.

Tan Syed Mushtaq Ali Trophy asayamung nung Nagaland team nungi Kense-i mezüng shilem agidar.

jembi aser Chennai nung asaya mapang iba ketdangtsür yagi Kense asayaba angu. Kense ya Nagaland nung yimtsüng tilaka nungi lir aser Mumbai Indians trials atema pa jaokba osang angazüka pa peladok. Auction nung pa alia aser IPL team mashika nungi asayatsü maongka ngura Nagaland Cricket team atema iba osang ya tuluka asütsü. Iba den külemi, Northeast team nungi IPL nung shilem agir rongnung Kense ya mezüng akümtsü.

Iba asayamung nung, Kense'er teloki junga shilem agiogo. Northeast nungi junga asaya team rongnung Nagaland team alitsü. Iba asayamung Plate Group nungi Nagaland team pur asaya pungo asayatsü renem aser asaya pezü tashi kokogo. Tzünglu aruba ajanga asaya tanga ka, koba Chandigarh den liasü, iba ya masayatet. Plate group nung Nagaland team ya Bihar aser Chandigarh sülen jenjang tasembuba ang ngutet.

Tamil Nadu, Baroda, Rajasthan aser Punjab team tem semi-finals atema qualify süogo, koba Hokolbarnü asayatsü. January 31, 2021 nü Ahmedabad nung final asayatsü.

Motera stadium nung terepranger melatsü imlar: BCCI

New Delhi, Aenjeti/January 28, 2021 (Agencies): Taruba ita - Febuary aser March nung India aser England na tsüngda cricket asaya atema Ahmedabad aser Pune stadium nung terepranger melatsü asoshi Indian cricket board (BCCI)-i asadangdar.

England aser India tsüngda mezüng test asaya ana atema terepranger shilem 50 tashi melatsü asoshi BCCI-i Tamil Nadu Cricket Association (TNCA) dang asüngdangogo. Ajisüaka, coronavirus wara nungi ajak kümzüka yutsütsü asoshi TNCA-i iba ya magizük. Mezüng Test February 5, 2021 nü nungi tenzüksü

TOI sangdong ka ajanga angazükba agi, Ahmedabad kübok Motera stadium nung Tests ana aser T20Is pungo; aser Pune nung ODIs asem atema BCCI-i tereprangertem arudaktsütsü imlaa atadar. "Board-i tentet ana den jembia arudar aser health bangdakpurtem ajanga temelaba ajak agütsür sülen item tesem (stadium) nung terepranger dena cricket asayatsü akok" ta senior BCCI ketdangtsür kati ashi.

Motera stadium nung terepranger densema mezüng

international asayamung ayongzüksü asoshi BCCI-i kanga dang yongyar. Iba stadium nung terepranger tasazük melatsü asoshi ano telemtetba magii lir. Tang, Motera nung terepranger lakh 1 shi asemtsü tasazük nung yanglua lir asünung, BCCI-i iba stadium tasazük indang shilem 50 dang nungi tajemba melatsü asoshi asadangshitsü akok. Osang ajanga angazükba agi, iba asayamung mapang Motera stadium nung terepranger 25000 nungi 30000 tashi melatsü, ta sangdong nung shia lir.

Iba series indang mezüng Test asaya ana atema India aser England team Chennai tonga aruogo. Osang ajangasa angazükba agi, India indang chief selector tasen, Chetan Sharma-a bubble telungtetit aito. Team anaprongla anogo pungo quarantine asütsü aser mezüng Test asayatsü aliba tejakdang anogo asem dang training melatsü. Iba series atema asalentong yanglutsü asoshi Indian team management-i virtual team senden ayongtsü. Kasa mapang, Sharma-ia team management aser captain Virat Kohli den senden amentsü akok.

Tokyo nung Artistic swimming qualifier atsülanger

Tokyo, Aenjeti/January 28, 2021 (Agencies): Tang Japan nung coronavirus wara lendong ajanga 'state of emergency' kübok senzusenbongtsü nokdangba asadangteta, 2021 indang mezüng Tokyo Olympics test asayamung thitsütsü akümer, ta Brehostibarnü (28.01.2021) asayamung ayongertemi metetdaksü.

Coronavirus wara ajanga taoba küm nungi Tokyo Games asayamung anogo atsülanga arudar aser tang artistic swimming asayamung atema qualifier athir. Tokyo nung March 4 nungi 7, 2021 tashi iba artistic swimming qualifier asayamung asayatsü renem, saka ita ana sülen ang iba qualifier ayongtsü.

Athlete tem timtem kecha melii shilem agitettsü aser tang Japan nung tenokdangba balala asadanga, artistic swimming qualifier asayamung thitsütsü asoshi Tokyo 2020 achaayangertemi telemtetba agi.

Iba qualifier ya May 1 nungi 4, 2021 tashi Tokyo Aquatics Centre nung agitsü.

Tokyo 2020 achaayangertemi ashiba agi, April ita Diving World Cup aser May ita marathon swimming densema Japan nung tanga qualifying

asayamung tem renemba ama ayonga asayatsü. Tang, Japan telungi bendanger shinga maitdaksür. Iba den külemi February 07, 2021 tashi Tokyo aser linük tesem tanga nung state of emergency sangdonger lir.

Coronavirus wara tenokdangba ajanga anogo atsülangtsür aliba Tokyo 2020 Games atema Japan-i arutsü alir athlete tem iba tenokdangba (linüki arutsü melaba) nung dena maliasü, saka tan ita tetenzüklen Japan sorkari athlete tem atema iba temelaba agienogo.

Qualifier asayamung dak sendakba nung, anti-virus meratem agia iba artistic swimming asayamung ya mezüng test asayamung ama agitsü renem.

December ita, Tokyo 2020 chief temi anti-virus temzüng kakat ka sayaa aser parnoki ashiba agi, iba wara süshia mao/mazüoktet yongjia, vaccine ka medeni iba games timtem kecha melii ayonga asayatettsü.

Ajisüaka, taküm iba Games ayongzüksü asoshi ishikati dang mulunger, kasa mapang Japan nung nütsüng shilem 80 agi iba asayamung ano atsülangtsü mesüra thitsütsü asoshi tebilemba lemsatepogo.

2022 Women's Asian Cup January 20 nungi asayatsü

New Delhi, Aenjeti/January 28, 2021 (Agencies): India nung ayongzüksü aliba 2022 Women's Asian Cup asayamung ya January 20 nungi February 6, 2022 tashi asayatsü, ta Brehostibarnü Asian Football Confederation sangdong ka ajanga metetdaksü.

Iba asayamung nung team 12 agi shilem agitsü, koba taoba edition nung team 8 nungi team asem tashi bendenloktsü. Iba edition atema Team pezüzü densema telok asem lemsatsü aser anogo 18 nung asaya 25 asayatsü. Quarter final asalentong tasen atema team 8 qualify asütsü.

Kasa asayamung ya 2023 FIFA Women's World Cup atema qualification asayamung ama asayatsü, kong team 32 agi shilem agitsü aliba asayamung nung iba asayamung (2023 FIFA Women's World Cup) ayonger team - Australia den Asia team pungo adentsü asoshi maongka angutsü.

Ano külen, 2022 AFC Women's Asian Cup atema Qualifier asayamung ya September 13 nungi 25 tashi tesem ka nung asayatsü. Iba mapang temaba jenjang nung

alir team asem Japan, Australia aser China den automatic qualification angur team - India nung den külemi asayatsü asoshi final eight nung tokteptsü.

AFC General Secretary Dato Windsor John-i, "Tesüiba küm ishika tejakdang nungi football tsütsü India kanga renloka arudar aser AFC Women's Asian Cup ajanga iba saisapong wadang tsütsü India-i mera tuluka agitsü onoki imlaa atar, koba ajanga iba asaya atema tejangraba tali tashiitdaksütsü aser tarutsü asoshi football asayar (tetsür) aser iba asaya sapur fans tem atema jenjang tajung yanglua yutsütsü," ta ashi.

Taruba küm India nung marquee asayamung ana rongnung iba asayamung (2022 Women's Asian Cup) ka alitsü. Alima ajunga asüngba COVID-19 wara tenokdangba ajanga 2020 küm asayamung thitsüba sülen, 2022 FIFA U-17 Women's World Cup ayongzüksü asoshi India nem temeden agütsü (hosting rights).

"2022 küm AFC Women's

Asian Cup tenzüksü kisüng dang masü, saka India nung tetsür football atema tongtimbang asütsü, kong asayamung tulu ana tashi asayatsü renema lir. International asayamung tem ayonga asyaba ajanga Tetsür Football wadang tsütsü renloka aoba aser alima tesem ajunga nung nüngtugu akümiba onoki nguogo aser 2022 küm iba asayamung ya tongtimbang mera ka asütsü," ta All India Football Federation President, Praful Patel-i ashi.

"Iba asayamung atema team 12 tashi atsülangtsür asünung, fans temi India nung Continent balala nungi tetsür football asayar tajungtiba asaya reprangtsü asoshi maongka angutsü. Iba asayamung ayongtsü asoshi onok tajungtiba renemtsü asadangdar aser team den fans atema jenjang tulu aketba asayamung ka ayongzüksü teimla nung achaayangtsü," ta pai shisem.

India-isa 2016 küm AFC U-16 Championships aser 2017 küm FIFA U-17 World Cup ayongzüksü.

BILEMDANGANG

"Tamakokeri teti takoker tsüngken tsübur."